

Julung kali penuntut antarabangsa menang kerusi Pilihan Raya Kampus UTHM

Nashwan dari Yemen catat sejarah

Oleh **HAMDAN TAWADI**
utusanjohor@utusan.com.my

BATU PAHAT 1 Mac – Kewibawaan memimpin dan pergaulan dengan penuntut tempatan membolehkan Nashwan Hamid Yahya Al-Emad, 23, dari Yemen memenangi kerusi umum pada Pilihan Raya Kampus Universiti Tun Hussein Onn Malaysia (UTHM) baru-baru ini.

Walaupun hanya terdapat kira-kira 400 penuntut antarabangsa di UTHM, Nashwan Hamid berjaya memperoleh lebih 1,000 undi.

Ini menunjukkan penuntut tahun tiga Fakulti Kejuruteraan Awam dan Alam Sekitar itu turut

memperoleh banyak undi daripada penuntut tempatan.

Kejayaannya turut mencatatkan sejarah tersendiri apabila julung kali penuntut antarabangsa menjadi calon yang memenangi kerusi Pilihan Raya Kampus UTHM.

Pilihan raya yang berakhir pada 22 Februari lalu itu menyaksikan 59 calon bertanding merebut 20 kerusi fakulti dan 10 kerusi umum.

Peratusan mahasiswa UTHM yang keluar mengundi adalah 75.85 peratus atau 7,122 penuntut daripada 9,390 yang layak mengundi.


Menurut Nashwan, dia memang suka bergaul dengan penuntut tempatan yang peramah selain mengagumi kepelbagaian budaya masyarakat ma-

jmuk di negara ini yang dapat hidup bersatu padu.

“Malah antara manifesto yang saya bawa dalam pilihan raya adalah untuk memperbanyakkan aktiviti bagi meningkatkan interaksi dan komunikasi antara penuntut tempatan dan antarabangsa,” katanya.

Dengan moto ‘Berikan Undi Kepada Yang Berhak’, Nashwan Hamid turut berazam mewakili penuntut antarabangsa bagi memperjuangkan hak dan kebajikan mereka.

“Selain itu, saya juga akan berusaha untuk memohon pihak universiti menyediakan lebih banyak kemudahan penapis air di kampus terutamanya di perpustakaan,” katanya.



NASHWAN HAMID